

Mál nr. 303/2013**M****og****vátryggingafélagið X v/ ábyrgðartryggingar bifreiðar.****Ágreiningur um tjón vinnuveitanda vegna launakostnaðar af völdum óvinnufærni starfsmanns.****Gögn.**

156. Málskot, móttakið 3.9.2013, ásamt fylgigögnum.

157. Bréf X, dags 24.9.2013, ásamt fylgigögnum.

Málsatvik.

Hinn 20.2.2013 var A ekið aftan á bifreið sem B, starfsmaður M, ók. Við slysið varð B óvinnufær um þriggja mánaða skeið eða til maíloka 2013. Á þessu tímabili kveðst M hafa greitt B samningsbundin laun og önnur launatengd gjöld, samtals 1.347.023 krónur. Þá hafi hann orðið fyrir tjóni vegna missis hagnaðar og aukinna yfirvinnugreiðslna samtals að fjárhæð 175.110 krónur.

M kveður rekstur sinn vera smáan í sniðum og fáir starfsmenn séu á launaskrá eða um fimm stöðugildi. Vegna smæðar rekstursins og takmarkaðra fjárráða kveðst M ekki hafa átt þess kost að ráða annan starfsmann til sín.

M hefur krafist bóta vegna tjónsins úr ábyrgðartryggingu A hjá X. X hefur viðurkennt greiðslu bóta vegna hagnaðarmissis og aukinna yfirvinnugreiðslna M, en hafnað bótaskyldu vegna launa og launatengdra gjalda sem M innti af hendi á því tímabili sem B var óvinnufær.

Álit.

Samkvæmt 2. mgr. 17. gr. skaðabótalaga nr. 50/1993 getur vinnuveitandi, sem greitt hefur slasaða laun eða aðrar launatengdar greiðslur vegna líkamstjóns, kafið hinn skaðabótaskylda um endurgreiðslu að því marki sem vinnuveitandi hefur orðið fyrir fjártjóni vegna slíkra greiðslna. Af orðalagi ákvæðisins þykir ljóst að í því felst ekki skilyrðislaus endurkröfuréttur vinnuveitanda á hendur hinum skaðabótaskylda vegna launa og annarra launatengdra gjalda sem hann hefur orðið að inna af hendi vegna óvinnufærni slasaðs starfsmanns. Endurkrafan er háð því skilyrði að vinnuveitandi hafi orðið fyrir tjóni af þessum sökum. Samkvæmt gögnum málsins hefur M ekki sýnt fram á að hann hafi orðið fyrir fjártjóni vegna veikindaforfalla M umfram það tjón sem hann kveðst hafa orðið fyrir vegna hagnaðarmissis og yfirvinnugreiðslna og X hefur viðurkennt. M á því ekki rétt á frekari bótum úr ábyrgðartryggingu A hjá X.

Niðurstaða.

M á ekki rétt á bótum vegna greiðslu launa og launatengdra gjalda úr ábyrgðartryggingu A hjá X.

Reykjavík, 24. október 2013.

Þóra Hallgrímsdóttir hdl.

Valgeir Pálsson hrl.

Jón Magnússon hrl.